

昭德新編

晁迥

文碩閣

wenshuoge.com

目录

关于我们	3
提要	5
序	6
昭德新编 卷上	7
昭德新编 卷下	22

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

《昭德新编》二卷，宋晁迥撰。迥字明远，澧州清丰人，自其父始徙家彭门。太平兴国五年进士，至道末擢右正言、直史馆、知制诰，旋为翰林学士加承旨。天禧中，判西京留司御史台，以太子太保致仕，卒谥文元。是编为其晚年所作，因居昭德坊，故以名书。宋初承唐余俗，士大夫多究心于内典，故迥著书大旨，虽主于勉人为善，而不免兼入于释氏。自序谓东鲁之书文而雅，西域之书质而备，故此五说酌中而作，盖指下卷指迷五说也。李淑言其服膺坟典，耆年不倦，少遇异人，指导心要，王古称其名理之妙，虽白乐天不逮，其所学可知矣。迥五世孙遯，搜罗家集得此书于丹棱，李焘庆元中尝有刊本，明嘉靖间又有重刊本。此本旧题裔孙伏武重录，迥自序及李遵勗序语，皆与晁遯所记相符，盖犹旧本。其后附迥及明晁堞、晁东吴三人之诗数十首，盖其后人采辑家集而未成者，文不相属，实为骈拇枝指，今悉删之，不着于录焉。

序

予尝历览古贤风烈，子刘子【唐刘禹锡】有云：读书三十年，百虑而无一得，然后知世所谓无非畏途，唯出世间法可尽心耳。繇是置几案者皆旁行四句之书，备将迎者，多赤髭白足之侣，深入知地，净通还源，客尘观尽，妙气来宅。予服勤斯言，景行先哲而能和长者之论，蹈高世之行者，则见之于故太子太傅文元晁公。一日具手疏，谈向来道义，继以所著《昭德新编》三策相示，且曰：非尚辞华，多存劝戒，止述大意，勿用虚饰，自为冠引，申明篇旨，俾之别叙芳爓，用施华槩，嘉故人之雅意，遭仍岁之多疾，文方嗟于将落，公倏悲于先露，追惟畴昔，泫然流涕。今里中多暇，一发珎蕴，复雪尘虑，翫绎辞理，有如子刘子焉。近之者则薰服乎椒兰之媚，法之者则性静乎龙颯之渊，将广布传，谅资探擷，思其人不可得而见矣！今翰林公以懿文华国登鸾鳳之署，荣于世官，以淡水论交挺金玉，其相表于风俗，懷先正绪余之感形尺牋，欸密之情，勉从践言，无爽修许云尔。时皇宋景佑三年七月一日，李遵勗序。

愚尝泛览前史，见有老而好学者，知其性之所乐也。今记忆其一二焉，因直书之。蜀向朗少时涉猎文学，潜心典籍，孜孜不倦，年踰八十，犹手自校书。南齐沈麟士少好学，及长隐居，年过八十，耳目犹聪明，手自抄寫细书，时人以为养身静默之所致也。后魏高允少孤夙成，有奇度，好文学，年九十余诲人不倦，手常执书吟咏，寻览愚窃不揆，因而省己，自筮仕及致仕越四纪，自未冠及大耄越五纪，而闲居已乆，年踰八旬，从昔至今，苟未有故，未始一日废观书、弄翰之学，絕无余好，性自然也。第寒迹孤进，禀赋愚直，猥以薄艺，幸会清世，策名委质，自结明主，绵歷两制，逮事三朝，进退以礼，荣愿满足，揣循愧惕，从于尸素，无功以利国，无德以惠人，深思立言，庶几补过。今故旁求内外经典中事，并耳目思虑所及之事，非为属辞，充笔苑会友资谈柄，直以积学岁深，晚節感悟，诸緣悉备，难得易失，浸加衰朽，不可虚过，切欲于古圣教法中，力行万分之一觉，利及他亦如之。窃详东鲁之书文而雅，垂为格言，简淡隐微，不可以洞晓；西域之书质而备，充于大藏，重复浩博，不可以周知。故此五说，酌中而作，夫信士属意而有福慧二业，慧业可以登妙道，此则别论，若欲勤修福业，结人天之胜緣，即此五说，最为精当，事贵洞晓是也。释氏经典，其说甚明，惟许作正观，不许行邪道，敏识之士，固当知之也。老马之识犹可使人以归路，老人之语，岂不能晓人以知？方敢告英妙，慎勿轻蔑。噫！栋宇宏壮居之者，当知经构之劳，品味丰洁食之者，当知烹造之劳。区区采述，其劳亦尔。流布心术，以代面谈，不在乎文，而在乎意，意之所至，斯可见也。彭门晁迥。

昭德新编 卷上

愚以引年，退居杜门，佚老日开，书帙甘味，道腴触绪，油然发为辞句，虽涉真性之外事，斯盖宿习之胜缘，乘兴而书，兴尽而止，潦倒踈阔，不切才情，锐思钩深，时得新意，意之所立，独谓当然，大率己心多以道胜为主，今复就而详择，取其不甚骇众者，杂而录之，凡一百六十七条，目之曰“新新理说”云尔。

晋羊祜起平吴之策，而议者多不同。祜叹曰：“天下不如意，常居十七八。”又唐权德舆《古兴辞》有句云：“沈忧戚戚多浩叹，不得如意居大半。”愚因知世间事差别齟齬，自古而然，率以为常，夫何足怪？

古人有“琴心酒德”之言，愚谓闲邪纳正，宣和养素，以此为琴之心也；无思无虑，其乐陶陶，以此为酒之德也。二者深趣，诚足多尚。然必因物自娱可得而言也，至若无所思之心，无所得之德，不假于物而恬愉，美妙不可得而言也。

愚之至愿，酷爱天马行地之骏也。旦刷幽燕，昼秣楚越。又爱鯤鱼乘流之迅也，朝发昆墟，暮宿孟诸，虽爱其如是骏、如是迅，自励进速，不望处世而乘亨衢，唯望出世而登妙道也。

必然之期，素定之分，谓之命；其理自然，谓之天命；知识此理谓之知命，委顺此理谓之委命；命与情两不相制，而于命中起一切之情，徒自苦耳，能不尔者，谓之达人。

上德至人之心理有四大：清而容物，豁然如大空，羣有不能碍；明白四达，皦然如大明，五翳不能障；中立不倚，屹然如大山，八风不能动；寂湛生光，晏然如大海，万象不能隐。四者备矣，此名自觉，圣智境界。

夫人之在道，如鱼之在水，得水即活，失水则死；人顺道则吉，违道则凶。此皆必然之理。故曰：“鱼相忘于江湖，人相忘于道术”，造极之语，信而有凭，苟能涉道深广，则不屑求于人矣。

学日益之道，譬如习射，非于一日之内，便得箭箭中的。学日损之道，譬如习驭，非于一日之内，便得步步如意。有应未应，此理当然，或顺或违，其事各别，无烦过悔，姑务渐成。

有一径直简当之论，不烦养身，但勿纵外物来伤；不烦修心，但勿纵外事来伤，守之有常，为法中王。

今之三教虽分明，立相有所不同，其实都是道也。故儒书《礼记》云：“天命之谓

性，率性之谓道。”道书《老子》云：“道可道，非常道。”佛书《华严经》云：“如来自在力，无量劫难遇，若生一念信，速登无上道。”此各举一端，其诸类例抑亦多矣。

孔子曰：“朝闻道，夕死可矣。”愚谓此言处世之道也，因而别得新意。设使有人学出世之道者，闻而复思，思而复修，日月岁时相继不已，比夫朝夕之促，不亦多乎？比夫不及思修，不亦幸乎？是知虽在暮年，学道必为殊胜若少年能尔，又何以加焉？

谚曰：“扬汤止沸，不如散薪。”愚因拟之别为偈句曰：“制心息虑，不如简缘。”

唐独孤及送李白序有语云：“才全者无亏成，志全者无得失。”愚爱之、重之，因而比拟别为偈句云：“道胜者无穷通，智胜者无忧喜。”

晋乐广以王澄胡母辅之，皆任放为达，广曰：“名教内自有乐地，何必乃尔？”愚尝出其意表，复维之以言曰：清静内自有乐地，不得同日而语矣。

公孙鞅初见秦孝公，为谈帝王之道，公则睡而弗听；后谈霸强之术，则不觉膝之前席。魏文侯端冕而听古乐则唯恐卧，听郑卫之音则不知倦。今人闻说仁义之道，世间法也，已不乐闻，而况道德之士、理性之论、糠粃仁义，宜乎懵然不知也。

古德云：“能忍于事谓之有力大人。”愚以为能达于理，谓之有智大人，能遣于情，谓之有断大人。

古人悯乎执炙者，终日执之而不知其味，因与啖之，其后报恩焉。愚亦悯乎诵经者，终日诵之，而不知其义，因与说之，为惠之大则与锡炙不同，若能感悟，其可忘此恩乎？

効官者严明，公正人不敢干以私，必然矣。学道者纯直，坚固物不能惑以邪，亦如之。

学道之人，当务深居绝迹以成妙，先当安置其身，深居绝迹，世俗不能见之，一妙也；又当安置其心，深居绝迹，鬼神不能见之，二妙也。此二妙者次第，愈难于难，而能者得道必矣。

身老浸衰，理之常也。心老浸高，道使然也。身相人可见，心相人不知。

夫曲终而奏雅，犹胜终不变其诤声。年老而修善，犹胜终不改其前过。

贤人君子但能持二种胜心，亦不可多得矣。俗心则义胜于利，真心则性胜于情是也。

愚夙慕白乐天之为人，虽才识不逮乎乐天，而志愿阂域其殆庶几乎？乐天有新制布绵裘诗，其末句云：“安得万里裘，盖覆周四垠。稳暖皆如我，天下无寒人。”愚有《击壤辞》，其末句云：“安得大金柅，制彼日月轮。免同流水车，今人续古人。”

触情之境，直视为空，情未能空，所应如响，响应即止，岂复有余？情之不留，亦当如是。此一法者，至简至奇难，然能然，乃妙中妙。

《书》云：“责人斯无难，惟受责俾如流，是惟艰哉！”愚因拟之，就改两字，别立意云：“教人斯无难，惟受教俾如流，是惟艰哉！”前言谓改过之人也，此言谓学道之士也。

愚思至理有三胜：力胜者，可以举大器；智胜者，可以断大事；志胜者，可以适大愿。愚既愚且老，智、力二胜，素非所能，志胜之一期乎？适愿不敢废志，所谓志于道者是也。

老子教人“知止足、惊宠辱”，庄子教人“齐物理、和天倪”，非权教，是实教，深识之士，必以为然。

古教以践言为信，愚好践意为信，行之虽未多，亦尝行之矣。何谓也？意之所及，未始轻许于人，惧口惠而实不至耳。践言之信，当如子路无宿诺，践意之信，当如季札挂剑之类是也。

万物空，万念空，万事空，万世空。唯有一不空为四万空之主，自古以来，人日用而不知者多。

羿基之矢，百发百中；和缓之药，百法百用。愚之立意，亦欲尽妙；愚之立言，亦欲百辞百要。区区之心，务乎破苦的，疗迷病，其理一也。

曲礼曰：“博闻强识而让，敦善行而不怠，谓之君子。”庄子曰：“以仁为息，以义为理，以礼为行，以乐为和，薰然慈仁谓之君子。”愚据此儒、道二书各言君子之事，人能兼而有之乎？人能得其少分乎？称君子者，不亦难乎？

常人发意，率多妄想，不名实想；常人发言，率多戏论，不名至论。能反是者，非常人也。若能自得于言意之表者，又于非常人中非常人也。

物生而后有象，象而后有滋，滋而后有数。是知万物皆有数矣。夫人以有涯之数，而营无涯之事，多见其不知量也。

天地之大德曰生，生者死之根，一死而不可见，故智者尽心焉。

老子曰：“名与身孰亲？”愚因而展转，别得新意而自言：身与心孰亲？心与性孰亲？若有人极深研几，贯彻洞密，臻乎理性之妙，然后知甘蔗氏之法味，渐入真境也。

尝见前辈有诗句云：“但知行好事，不要问前程。”诚如是言。夫君子第专修名节，不必专求所利，且顾名实相称，不可与愚俗雷同。反自亏损，而况为美事，必然有美利。

言有是非，口之过也。意有爱憎，心之过也。自踈及亲，次第化服，入道之理，孰曰无阶？

处世仕宦之人，有进有退，是也。越世高尚之人，有退无进，是也。出世超绝之人，有进无退，是也。此明大意，不复具陈。

过去无始，生灭常尔。即今非坚，生灭自然，未来无终，生灭何穷？既能知之，不当恋厌，有恋有厌，尽为障碍；无恋无厌，是名逍遥。

《论语》云：“父母之年，不可不知，一则以喜，一则以惧。”愚因拟之，别作四句云：“形神之候，不可不知，一则勿喜，一则勿惧。”何谓也？夫学道之人，当知形是空相，随气运而终衰；神是实相，得冲和而必盛。盛而勿喜，避客气而养恬，衰而勿惧，悟幻质而成觉。

曲士所见大槩颇同，或观像貌而争论【二字去声】，或闻言语而争论，或临文字而争论。三者皆虚妄矣。不到真实之处，真实之处无可争论，此理尤难和会，湏得有自然智、入无师觉，始可为愚莫逆之交。

教文中有语云：“鞭心入里”。愚爱此四字，有如庄子所说“鞭羊着羣”之意。彼以养生而设喻，此以入道而为言，摄念归真，其法当尔。

学世间法致人伦钦服者，其道浅；人伦不知者，其道深。学世间法致鬼神钦服者，其道浅；鬼神不知者，其道深。

《论语》云：“君子忧道不忧贫”。愚以为何必患于贫？贫乃士之常也。是以贤人，人不堪其忧而独忘忧，道则湏求道乃理之善者也。是以圣人，人谓无所得，自谓

有得。

见天机者必因根本智、自然智，成妙道者湏得法，忍力胜定力，此语至当，真学乃知。

三教利益，大约体同，不必湏归局分，妄称彼我。愚于保身之要，尝究嵇康《养生论》，此乃儒家之文也，非求术于鍊丹道侣。又于清心之要，尝究李翱《复性书》，此亦儒家之文也，非传法于拥毳禅师，苟未该明，则多滞固。

道则湏臾而不离，静则刹那而可贵。仁则造次颠沛必于是。古圣贤之言，意何如哉？噫！学道、习静、修仁，此三者安可怠忽？

唯道可信。观鍊薰修，入无有之乡，吾其逍遥；到自得之场，吾其优游。知我者谓我驯柔，不知我者谓我何求？

一气未判，万物未生，名曰混沌；一念不动，万缘不起，名曰禅那。故湏达本识先，方可栖真入道。

学多增智，定胜成功，至理所归，此言居最。

素王及隐君子之书，多涉外事，明在世智，而在人言意之内。古先生之书，多涉内事，明出世智，而出人言意之外。此二者，亦可见其圣神分限。

夫歆然之欲，■〈个 敝〉然之忿，隐然之忧，皆逆道，心于道为损；翛然自得，怡然自适，恬然自息，皆顺道，心于道为益。去彼取此，服之无斁。

《酉阳杂俎》中有辞句，题曰“闲中好”，其第一首云：“闲中好，尽日松为侣，此趣人不知，轻风度僧语。”愚因拟之，别作一首，名曰“静中好”，其辞云：“静中好，冥心归宴寂，斋已不虚吟，静是真消息。”

学而成道，始终四法，闲、静、寂、照是也。先以智断一切事，皆空尽拨去外，方得身心闲，闲而后能静，世间境界可得而言也，可得而至也。寂与照，出世间境界，不可得而言也，不可得而至也。至而当自知，言之不能及。

具信根之人，先有信心后有深心，所以于道弥近。不具信根之人，先有戏论，后有争论【二字并去声】，所以于道弥远，顺违向背，其理如此。

民之行法【行音德行之行】，刚柔以合理，勤俭以足用，止于此而备矣，可以为良民。施之于士，士有百行，亦宜包此，可以为良士也。

法相之学，习气未已，若论至当，唯有穷理尽性以为观，澄神定灵以为止。二者足矣，

旧说云：凡言合圣道，信有之矣。俗语云：言多伤行，食饱伤心。愚知此意，从正经根本中来，变雅成俗耳。《周易》颐卦象曰：“君子以慎言语，节饮食。”此是根本之言也。

莊子云：“嗜欲深者天机浅。”愚因别立一句以拟之，云：“障碍多者道眼丧。”

一真本无，自无而有，有万灵，分万类；一心本静，自静而动，有万念，成万事，还源返本，谓之妙一。

愚尝自省尚有微细劳扰之事焉，目有观书究理之劳，心有立言助化之扰，此二者，在无为法中为动相，在有为法中为善缘，盖由积习而然，未能顿除者也。

愚详观字之法有其二焉：观照之观【去声并同】，此乃烛理之妙智，学法者用，必居先观想之，观此，乃小根之权术，结想为化，只会三归一之阶渐耳。上根大达者，不必用之也。道家者流，多存想成物，过当则入邪，皆属有为之法，愚所不取。

天地间有形而无灵者，有灵而有形者，统而言之曰：万物也灵之又灵，而形肖天地者，谓之人伦，人伦赋象者，无遑无数，其中有英、妙二识焉。英识者秀出人伦，有处世之识而入于尘，已不可多得，而妙识者，又秀出英识，有出世之识而入于神，尤不可多得也。

世间法妄生分别种种名相，若以实际照之，都是一大虚妄。作是观者，名为达观。

人伦大槩之理应缘而生，随类而化，触境有恶欲【恶字音污】，系情有忧喜。若以道眼谛观，斯皆真性之尘垢也。

诗云：“虽有兄弟，不如友生。”愚以为：诚哉是言也夫！兄弟虽亲，或有阅墙寻戈之衅；朋友虽疎，或有同方莫逆之契，而况以至真之道相知者，其可忽之乎？

莊生有言云：“死生为昼夜。”愚因独断其事云：昼夜虽殊，都在十二时之数也；死生虽殊，都在三世之数也。常昼不夜，必无此理；长生不死，其可得乎？是故达人混然一致。

人无古今，不可荣，不可陋；性有智愚，□□有，可移如此，相知□难深【此章疑有缺文】。

古人戒筮数占梦，不许无疑而问卜。愚达此旨，盖縁习性过多，一则入邪见，一则稔贪心也。

观恶德，当如恶物而去之；观美德，当如美物而取之，此乃己之美利也，而多不然，岂非厯劫以来，习成颠倒之想乎？

晋陶侃在荊州日，无事輒运百甓于斋外，暮运于斋内。人问其故，荅曰：“吾方致力中原，过尔优逸，恐不堪其事。”又常语人曰：“禹圣者，乃惜寸阴，至于众人，当惜分阴。”愚详侃之志力精勤，而能建功名、升爵位有之矣，此乃世间之事，可思议耳。若有人移其志力以求出世之事，此不可得而思议也。

汉桓谭欲借班嗣莊子之书，嗣不许而报云：“吾子既系恋于世教矣，何用夫道？”晋陶侃又谓“莊子非先王之法言”。夫陶、班二贤，所见不同，盖其适用有伦类致，意有分限，未可轻议其取舍。愚能唯变所适，无可无不可。

《坐忘论》云：“旧縁渐断，新縁莫结。”愚谓学道之士，固当然也，犹以为该明未尽耳。夫累身新縁，则宜勿结，结之则尘劳羈继；入道新縁，岂宜勿结？勿结则胜因断絶，二者不同，在乎区别。

唐贤文章，有状其法门之语者，精集殊絶，愚尝耽味久之。因而比喻夫古圣经论，有如具陈品物，唐贤文章，有如用其品物，造为珍膳，得而食之，不亦幸乎哉？

愚老矣，日进妙道，唯守二法，可以足用，存灵明之心，期乎长不昧；习安住之心，期乎永不动。此外世故变移，物情差别，自古而然，不能顾问之也。

俗语云：匹上不足，匹下有余。愚详此语，亦是变雅成俗耳。其根本出于晋张华《鷦鷯赋》，赋中有语云：“阴阳陶烝，万品一区；巨细舛错，种繁类殊。鷦鷯巢于蚊睫，大鹏弥乎天隅，将以上方不足，而下比有余。普天壤以遐观，吾又安知其大小之所如？”

《论语》所云子絶四，愚因推而演之，明其大槩：夫毋意、毋我，谓其以道为度，无纵越逸之情也；毋固、毋必，谓其唯变所适，以备周圆之智也。苟有执其旧语，斯则名为竖儒。

汉班嗣有言：“莊子独师友于造化。”噫！愚未能然，但师友古圣贤尔。每览前言往行，布在方策之善者，窃忻慕之，而克己践履，冀少分焉，不求名，不求福，庶乎内无深愧而已。

夫隱君子之道，淡乎无味，古先王之法，妙而难思。愚于无味而得味，难思而能思

，所以三径就荒，絕来宾之迎送；九阳奋发，不驾言而出遊，恬然块居，怡然自适。

世间之法，顺理而动，鲜不成，逆理而动，鲜不败。出世之法，顺理而动则符合，逆理而动则违碍。此直言大槩尔。凡诸委细，智者详而行之。

昔孔墨车不停轨、驾不俟旦，力行化导，不求名利，为立名教。今老先生手不释卷，笔不停缀，多所采述，亦不求荣利，为明心法，自用自知，有如此者。

人或气之逆滞服名药以攻之有时觉药力之胜其气消融而和畅也人或情之鬱结原至理以发之有时觉理道之胜其情开释而恬愉也学人渐修之法固当如是

夫陆行緣崖谷，同途者视险易，而醉不如醒；水行冒风波，同舟者共安危，而醒不如醉。智人处世也，外释利，内忘忧，当思此法。醉坠者身不伤，比夫專气致柔，此则为假也；病忘者心不乱，比夫坐忘遗照，此亦为假也。假犹若是，而况真乎？

《文中子》有言曰：“通变之谓道，执方之谓器。”又曰：“通其变天下无弊法矣，执其方天下无善教矣。”愚以为通其变者，周万物之大智也；执其方者，守一隅之小智也。故先生以通字为名，愚知其才与智、名与迹咸相应也。

《文中子》中说云：子读《无鬼论》，乃曰“未能知人焉知鬼”？愚详此言，有以见此书叶得中之说，不以无鬼为然者恐违。《系辞》有云：“知鬼神之情状”，且必知晋阮瞻着论而亲经鬼，证其论不胜，若执以为无，是令人入断灭之见，又不言有者，恐涉《论语》语怪之事，令人起幻惑之心。此颇与孔圣意同。先生儒宗之宏达者，后人发言肆意，岂能出先生之域？

愚有所得，尝试陈之。老子云：“知足不辱”，莊子云“佚我以老”，言念克谐式符从祷，日省已往之非，驯致未来之道，自天授之永以为寶。

銳智钩深以穷理，渐见理多而有余，泯相归真以尽性，未到性空而无余，若到性空，其道成矣。

事有二如意，人多愿外如意，罕有愿内如意，此理可以智取，不可以言及。

究观万化不测者，灵灵而，形形而，情情而，声声而，名觉而，唯识者混而为一觉，而唯智者莫之与京，至凝至融，其道大成。

愚今于儒书经史中两处，各取四字一句以为精修胜进之法。《周易》文字中取“闲邪存诚”四字，《后汉书》文字中取“清心释累”四字，依言入理，可以足用矣。

智者详之可也。

或问愚曰：“先生深居不出，何以自娱？”愚对曰：“尝闻逸士隐身止依蜗舍，高僧送客不过虎溪。驾言寫忧，愚无此意。”

古今名贤多好读老莊之书，愚知大意以其于无为无事之中，有至美至乐之理也。

愚于三教，自得三全。三全之说，儒教本法务在言行相合，以全其名；道教本法务在神气相合，以全其形；释教本法务在理性相合，以全其灵。大率如此，无烦具陈。

蜀丞相诸葛亮与李丰书云：“思道则福应，自然之数也。”余今采而书之，以为法言。

愚有二好，非因外獎，好济其困苦而不求福报，好遵乎善道而不求人知。

老子曰：“五色令人目盲，五音令人耳聋，五味令人口爽。”愚因言见意，虽圣人矫激太过，而善利之心极于深切，人能不耽耳目之娱，不纵口腹之美，勿问有得，决定无失。

天时、人伦、形器，此三者，愚观其势数，皆于四也定矣。天时，则春夏秋冬；人伦，则婴壮耄终；形器，则成住壞空。此三者之好乃琐琐者也，若于其中有一枉用智力，保无变衰，愚不信也。

上智之士，有如刷燕秣楚之神骏，指郑麾晋之利刃，以此骏利，学出世法，何所不可？

愚有两大顺：外顺世间法，无所碍，内顺出世间法，无所违。内外无违碍，强人自在。

古德有云：妄执有为之法，名为邪见，若遂落于空，亦名邪见。唯不有不空之理，湏是自然明了而符契之，不可以筆舌缕陈也。于事得自在，故曰“无可无不可”，于道得自在，故曰“无为无不为”，何必多言？率由深智。

身从造化而有不可尽如意，事从因緣而亦有不可尽如意，遇乐贪乐，遂荒于乐；遇苦患苦，重增于苦。观照裁处，名具足智。

一气暂聚，万緣皆空，身与事何所有哉？此智断之道也。深入实相，安住妙境，志与行不可无之，此力致之法也。非此二者，愚将畴依？

愚谓：耀其心者致其昏，冥其心者存其明。明极见妙境，昏极落诸趣，必然之理也。学道之人，其智明了，其行真正，其断果决，其志坚久，相资而进，何往不到？

气质有衰，物数之常也。灵明不昧，天真之全也。知常达全，始可与言道已矣。

入道之法，随用有说，因理著名。愚究其极，皆湏不取相，不留迹，方臻妙处。

愚谓屏迹绝交游，则辈流不能加其是非，摄心入虚无，则鬼神不能窥其朕兆。退藏于密，故几于道。

愚所读莊老之书，各得一法。读《莊子》得“身心虚闲以自放旷，既优既游，一如不系之舟”，读《老子》得“质性浑粹，以自镇静，匪雕匪斲，又如无名之璞。”所得如此，人其谓何？

愚以为，自得则象前言智。老子云：“吾有大患，为吾有身，及吾无身，吾有何患？”愚因则而象之，自立言曰：吾有大患，为吾有心，及吾无心，吾又何患？噫！身心之累，其唯患患乎？若得身心无患患，乃为出世之人也。故莊子云“有大觉然后有大梦”也。注云：夫人大觉者，圣人也，大觉者乃知夫患，患在懷者皆未寤也。

汉班嗣荅桓谭书云：“夫严子者渔钓于一壑，则万物不奸其志，栖迟于一丘，则天下不易其乐。”愚尝自谓：得则象智，因复则而象之，以言己之所趣云，安身于一空，则百空不可易其居，安心于一法，则万法不可夺其志。

士有清遠绝奇之行而能越世高蹈，不婴患累，有如鸿飞冥冥、鳳翔千仞者，已不可多得。或于其中更有正真明微之见，而能穷理尽性，别见志趣，犹独象无侣，龙乘风云者，岂可以世智评品哉！

情以理夺，事以道应，彼之违负，是彼之非，不当骇叹己能，不然，已则无咎，反成道胜，又何不足之有？

夫人分一元之气，有形而成身；分一真之精，有识而成心。故曰：精气为物，物极则反，复归无物。故曰：遊魂为变，强名生死，何有彼我哉？

愚以晚年之心，入道弥切，触目会意，皆得法门。夫注水入瓶者，器渐深则无声；炆炭入炉者，火渐炽则不动。禾穗渐重则低垂，树果渐熟则甘美。因而成法言以自规曰：观水观火，观穗观果，此法渐修，理无不可。

莊子云：“薰然慈仁谓之君子”。又云：“能体纯素谓之真人”。愚谓人能外量己

力随分，慈仁及于物内求己志随分，纯素存乎心，得与君子、真人为徒，不亦善乎哉？

愚尝谛思养身之法，随分多少在乎动导引是也；养心之法，随分多少在乎静宴息是也。此亦自是动静交相养之一说也。

教中之语有云：大达大观，大慧大觉，如此之类，非垂空言，非乐小法，体此存诚，不可轻废。

观炼恬虚之法，善入无为；详求保养之方，永锡难老。二者之外，愚不知也。

莊生之旨谓附赘悬疣以为形之累，决疣溃痈其苦乃尽。愚谓执身有我以为性之累，空蕴无碍其乐自生。触类明理，固当如是。

愚谓动心之劳不如息心之逸，多闻之惑不如独觉之得。但能观照入理而不失其正，融练臻极而不住于相，如此足矣，更复何求？

历年增高而年颜衰，入道弥深而道心盛，此理必尔，何烦询求？愚今则然，勿忧有喜。

利物者不期于福而福自应，学法者不期于慧而慧自证。故愚不忘修诣，不着希求。

莊子云：“圣人休休者”。愚以此为合乎道也。吉祥止止者，愚以此为道之应也。愚但见读莊子者有之矣，而未见有得意而演之者也。

愚读《易》，爱“钩深致远”凡四字，因而点化敷演以自明其志云：銳于求智，如專釣之釣钩重渊之深；力于行道，如專馭之馭致千里之遠。

唐白居易有诗云：“当壮已先衰，暂泰还长穷。”此叹天均之薄也。汉马援有语云：“穷当益坚，老当益壮。”此图世间之事也。愚身虽老，不觉在己之衰穷，而觉康泰之庆幸。愚心益壮，不图世间之事而求出世之道，自谓所得多于昔贤矣。

依于外疎遠之事，迷者之心也；依于内亲近之事，悟者之心也。智断已定，复何疑乎？

动中有静，静是其体，不失应緣之精真；静中有动，动是其用，不伤归一之根本。洞晓冥契，乃上上智。莊老之言，书为法利。

愚谓调御之法，调御心气而已。大约学道之士，其心也定动相半，其气也纯杂不一

，调御之浅者也。若能在心为志定而不动，专气致柔纯而不杂，此则调御之深者也。举要而言，姑务心以平宁为本，气以和顺为本，此名无为真见，乃法之利也，可以师之也。而有存想构致，其心又有鼓动吸纳其气，此名有为异见，乃法之病也，不可师之。统名调御之法，在乎精鉴而已。

益其智者学也，所以观书而穷理尽性；宁其志者道也，所以宴坐而澄神定灵，古德归心，必不过此。

脱叶辞柯，见有时而终落，闲云出岫，仰无心而自高。何必读书然后能觉？

《左氏春秋》有言云：“在德不在鼎。”愚亦自有言云：在心不在境。前言之意，盖谓国以德，而轻重不在于鼎，鼎不可问也。愚谓居以心，而躁静不在于境，境不必择也。

愚尝读《汉书》，见张子房事迹，始受教于黄石公者，遇彼神人也，终欲从赤松子者，学彼仙人也。愚谓子房非徒列将相之杰，抑亦神仙中人。

昔向子平读《易》，盛称损益二卦。愚初未详古人之意。今自读《易》至此，而爱其“损”卦惩忿窒欲，“益”卦迁善改过，损益之要，其在兹乎？

昔晋王衍有云言：“圣人忘情，最下不及于情，情之所鍾，正在我輩。”愚因而自有言曰：圣人复性，最下不达于性，达而求复，正在我輩。

愚以历年浸衰，思道弥切，空野独步，叹大象之絕俦；高岸期登，愧小狐之未济。

乐天知命，故不忧；穷理尽性，故不疑；少私寡欲，故不贪；澄神定灵，故不动。四者备矣，一以贯之。此叅用诸书，助修善行。

自念大耄爰臻，近思愈切，观一切事，不计顺违，推理安常而已；随一切时，不以多少，息縁反照而已。止此足矣，何复言欤？

愚读三圣之书，各是一法之妙。孔子书中，愚见大和之德，油然而生，是谓无声之乐。老氏书中，愚见大象之道，混然而成，是谓无名之璞。释氏书中，愚见大寂之光，自然而明，是谓无心之觉。必也读书，当如是学。

至圣御世，乃情之术，以权而济；至神出世，乃性之道，以实而致，用有攸宜，理无不可。

唐柳公度善摄生，年八十余步履轻便，或有求其术，公度曰：“吾初无术，但未嘗

以元气佐喜怒，气海常温耳。”愚详公度所言，乃摄生之法，而令元气和而复暖也。愚因类举，别得摄念之法，保护本觉，勿以本觉随梦幻，常令本觉明而复正是也。彼以身而言，此以心而言，若能并用二法，何胜如之？

晋嵇康文章有《绝交书》、《养生论》，涉乎高邈之地矣。而孙登答康之问，以火之光喻人之才，其言大意云：火用光在乎得薪，所以保其耀；人用才在乎识真，所以全其年。今子才多识寡，难免乎今之世矣。后果如登之言。愚爱重登之所言，“识、真”二字最为精要，有以见康之赋分不识其真，未得其全，所以先于周身之防，反以薄锤会而速祸。愚谓必须才识兼茂，表里俱济，然后可以成道器。

愚闻古有大人先生，天真之心诚而明，天和之气虚而清，混而为一，莫之与京。愚当思古，自明而诚。

愚以顾惜残年，详求妙道，真诚达本，洞分了义之经，蠲忿忘忧，兼采养生之论，苟能自得，何假朋来？

愚读经史而记得“三无闷”。《周易》云“遯世无闷”，“不见是而无闷”，晋嵇康云“自得而无闷”，愚录之为心要焉。

观微妙书，穷理尽性；生微妙智，温故知新。闲觉心而愈明，致道力以增胜。苟无旷日，夫复何言？

愚览羣书，不拘类例，姑务唯变所适，曲尽其妙，采诸文句，立为心法。《乐记》云“和顺积中”，愚因此四字，但以气和为贵。《玄纲论》云“虚明含元”，愚因此四字，但以心虚为贵，心虚气和，可以入道，不烦致诘，从当自知。

自求多福，福会由乎外，非己力之能必全，故可否相参也。驯致其道，道成由乎内，斯由己力而无不可。夫求福者众，致道者寡，盖万分或有其一尔。

孔子之燕居申申，此表和舒之貌，适性而已矣。《庄子》云吉祥止止，此表斋明之心，致道使然也。二者不同，愚能辨之。

情恕理遣以接物，静安闲乐以奉身，持此相资于焉是用，其它细故，何必介怀？

愚得四法、凡八字，可以足用。何谓也？究观先觉，理遣对治【音持】。此皆羣书旧语，已之演述涉入多矣，今又畧集大端，以为细要，庶事分摄，应机而行，自能了知，不可条陈缕细也。

虚缘而委顺，无必无固，闻法而开悟，不惊不怖，自谓真修智力粗得百分之一尔。

善恶之事，譬诸草木，为善如植树，宜其徐也，深固则易茂；去恶如薙草，宜其疾也，滋蔓则难图。

练天真之心，养天和之气，守天均之分，求天然之智，率兹素履，協彼清休，人虽不知，自云有得。

常用三法：智照、理夺、对治是也。常用三心：不着、不动、不退是也。大畧如斯，细分由已，六者无亏，可以足用。

孟子曰：“孔子登东山而小鲁，登泰山而小天下。”愚晚年归，趣好读古圣人述作该明理性之书，其有广大精微条畅臻极者，读之令人胸中廓然，下视小学、旧百家秘物之言，一何丛脞哉？

屈其道而不屈其身者，常情也；屈其身而不屈其道者，非常情也。常情者至多，非常情百中有一。

俗语云：有福之人不居无福之地。愚谓此说系乎天者也。愚因拟之而言曰：有智之人不作无智之事。此则系乎人者也。

言者，心之声也；梦者，心之影也；想象者，心之画也；无言者，譬如复雷而无声也；无梦者，譬如处阴而无影也；无想者，譬如绝笔而无像也。其理必尔，是故智人不可不知“止、观”二法。

愚偶为五字二句以自述云：临文观众妙，就枕得三休。上句谓广求细论，智也；下句谓每觉微倦，实时而寝，寝则眼力、心念、支体三者得休息也。

愚晚年读《周易》，颇爱其“遯世无闷、乐天无忧”，所以观外事悠悠，得中心休休。读《庄子》，又爱其“纯素之道、唯神是守”，守而勿失，与神为一。所以杜门不出，退藏于密，庶几葆贞，永膺元吉。

水静极则影像明，心静极则智慧生。详此体用，其理备矣。真学不必多，多则惑也。

日影冉冉转移，心相念念迁谢，形终归空，故强名曰“梦”。

数必有定，势不暂停，圣人有先知，凡人都不觉，谁明此理，愚当与谈。

夫厚于利则薄于义，束于教则昧于道，中人以下之常情也。古今而然，不当惊异。

入道之门，愚自立法，收视返听，绌聪明以求性，抚心定气，务恬虚以养智，守而勿失，用之不匮，过此以往，则非愚意。

外縁之动如云也，内贞不动如山也。至人虚心顺縁，不失其真，犹云山相依而不相妨也。

夫道充于内者，岂惟捐爵屏贵可使？文侯轻其魏，而以国为累，斯可知也。

有客问愚曰：“丈人何故久不出？”愚对曰：“愚爱身心俱不出。愚身不出，退藏于密，燕居方丈之室；愚心不出，深入不二，杳冥方存之地。”人以愚为愚，愚自以为智。

昭德新编 卷下

静深生四妙辞并序【并次题共四十七首，今止存二十九首】

夫气聚成物，聚从则散；炳灵鍾秀，出必冠伦。多以宿习睽真失在于动，或知静趣则近道焉。谛思渊静中，自然生四妙，势数相继，若岁之时，天机可窥。大信不约，爰得心要，以为秘寶，安虚明乐。端如贯珠，因书“静深生四妙辞”云：

了知入道门，先从静为祖。静胜则心安，安从虚灵府。虚极发明灵，洞彻无不覩。天然法乐多，岂比闻箫鼓？

有警辞

图上华夷能尽记，未始经行一步地。博闻强识总周知，心不能行亦如是。

三悟辞

若能觉其梦，且悟浮生如戏弄；若能智其识，渐悟狂知枉心力；若能性其情，大悟归真即妙明。喜得自然三悟法，书之聊以表研精。

书绅二法辞

心如常满杯，所以明知足。心似不燃火，所以明无欲。二法可行持，书绅聊自勗。

高年约已自诲辞

愚尝究观万物万情万事万理，同异相杂，自古而然，目为太常，顺为心要久矣。今兹渐老，因更约已，裁定自诲之辞，作方便门：夫世间之法，理湏决择，则有辨白褒贬耳；出世之法，本贵混融，虽未能即行方外圣贤之行，但且学古来之名士，卫叔寶不见喜怒之容，阮嗣宗口不臧否人物，斯亦甚善。此外虚懷任运，勿复以悠悠介意，一切之事实时而过，去如空中云，一切之念实时而消，尽如汤中雪。唯有详味道腴，膏润深智，避诸愤闹，日臻凝寂，此则不可灭裂也。

超真独觉辞

了达事终虚，往事何殊梦。此后事来干，屹如山不动。了达事终虚，往事今何在？此后事来干，豁若空虚碍。独觉贵高奇，杰出羣迷外。

知常委顺辞

纷然往事来，浮云经大空。喧然是非声，惊飙触灌丛。古今无奈何，委顺于其中。

自为观照总持辞

事往终空。如云如风。事来不絕。如日如月。摄念神凝，从习而成。触境情起，实时而止。不可殫言，自当求理。

反本观空无碍辞

形是幻，情是梦，寝兴视息随羣动。当念元来一切无，豁然顿遣心中空。

简求心要书绅辞

以静制动，静为躁君，以虚受有，虚緣葆真。详而后习，可书诸绅。

道贵养生辞【去声】

若夫殉乎物，轻乎身，有如千金之劍，用以析薪，百鍊之鑒，委于穷尘。愚嘗观妙法，见大伦，不欲汨【音骨】其真，亏其神，动与天亲，静与道邻，故作是说，敢告同人。

并用存心微妙诀

处世间法，或伸或屈；用观察智，无固无必。出世间法，勿违勿失；用决定信，惟精惟一。曲尽其妙，退藏于密。

四方观练深心诀

性之生情，为梦为想；性之生緣，如影如响。不有古圣，愚将安仰？不有妙道，愚将安仿？爰得智刃，决开疑网。人不同心，超然独往。明融日新，率由天獎。

学道三深畧论

愚以为学道之人，三者备而道可成：谓智也、断也【决断之断】、修也。见诸相之非相，知一真之甚真，智之深者也。破坚摧刚，无以挫其銳，穷势极利，不可夺其志，断之深者也。备更夷险常率履，未始湏臾忘致力，修之深者也。苟能如是，何往弗济？

洞心情境定心篇

物来诱之而不随，物来触之而不动。不随不动由自心，何須结社询千众。万事悠悠过即空，追思岂异春宵梦。

与道相知最乐篇

人多乐于新相知，又多悲于生别离。唯能与道相知久，如鱼乐【五教切】水无睽时。乐道【乐字音洛下同】至乐非常乐，冥真造【音操】适潜熙怡。迢然在心不在境，安能更与白云期。

三法自然歌

心本不愆自然戒，何用科条防毁败。心本不动自然定，何用勤劳止自兢。心本不迷自然慧，何用叅寻叩伦类。即今知此三自然，奉以周旋无失坠。

无有所求歌

无所求，摆落人间万事休。有所求，瞻养衰年乐圣猷。不愿竹木林内隐，不愿莲花社里收。愿在清平仁寿域，含华守素得优游。

醒默居士歌

白氏先生耽醉吟，衔杯酒翰恣欢心。樽空才尽若为计，释闷遣懷功未深。愚称居士名醒默，清思忘言求妙德。习此功成道更高，不到诗魔兼酒惑。

素履嘉祥讚【并次题共二首】

愚不求名，含华隱曜。愚爱栖真，坐忘遗照。愚独闻和，披音露妙。视履考祥，兹为吉兆。

了知妙湛归心讚

空中圣真，具大威德。善入无为，允臻其极。愚心师之，密与神会。凝然不动，皦然不昧。日慎一日，有进无退。

三言约已自修箴

愚修心，自作戒。勿驰散，勿昏昧。不分别，勿留碍。去纏縛，令自在。破忧恚，成欢泰。保其身，无败壞。进其道，无懈怠。铭座隅，书绅带。

过幻日损箴

过而能改，自然寡悔。知幻即离，何劳用智。日损之师，简要如是。

道为心寶铭

名非身亲，利令智昏。身智之外，夫何足论？食充且美，衣敝仍温。深藏至寶，道心常存。

心要铭

心要之法妙矣哉，先之以自觉济之，以力学。自觉者，生知之本也。力学者，闲览之助也。言不尽意，举其宏纲。辞约意微，绎之为贵。铭曰：物灵而贵，贵乎先觉。大道坦明，迷心踳驳。妙法难思，精微渊邈。必也读书，然后为学。

放归去来辞

陶令曾言归去来，解印还家不迴首。屏贵都遗身外名，忘忧酷嗜杯中酒。白傅曾言归去来，了知浮世非长久。独步逍遥自得场，饮食寝兴随所偶。罗隱曾言归去来，濩落生涯何所有。明日船中竹一竿，要学江湖钓鱼手。晁叟亦言归去来，抗表辞荣养衰朽。京洛红尘旧满衣，总脱临风都抖擞。

双喻辞

人事常酌中，取象如斲器。器平不斲覆，有同身爽利。道心常不系，取象如虚舟。舟闲随逝止，可比性优游。能符双喻者，何虑复何忧。

智断身心辞

咨咨尔幻身，谁能住世久，洪纖妍丑，岂长存而不朽？咨咨尔幻心，常随外物诱，风生电灭，求其状而何有。豁然达理，忽洞见于天真；未能无闷，或沃之以圣酒。去乡遊荡久不归，今觉穷途自回首。

集句书绅自用辞

蒙以正德而隱，專于静遯于遯，无是无非无所求，无名无迹无诸闷。愚自书绅用此言，深心更与何人论。